

故事人物：

陳富榮——28 至 30 歲。郵差，沉默內斂。有點自卑，不善表達內心情感。

張少眉——24 至 26 歲。工廠女工。聰明、倔強。有自我思想的人。同樣不喜歡說話的人。但敢言。

黃國安 (INDY) ——28 至 30 歲。士多少東。多言裝強，但內裡善良。粗枝大葉。

陸英 (蝦頭) ——23 至 25 歲。偷渡客、安表妹。大陸大學生。踏實，實事求事的人。

周令祺 (SIMSON) ——24 至 26 歲。榮同事。初期為春的男朋友。多言嘍仔。不羈滑頭，但後轉成熟。

張春 (CAT) ——20 至 21 歲。眉之妹。初期為祺的女朋友。任性、永不成長的一個城市女子。

SC1

1976年夏天下午

安記士多門前

(收音機的節目聲。)

(燈亮，士多，黃國安百無聊賴的坐著。)

(只有收音機的節目聲伴著他。)

(一會，陳富榮身穿郵差服，背著郵袋，由另一邊入。)

(榮步到士多前。)

榮：(向安)俾枝 cola 咁，唔該。

(安去拿 cola，榮放下郵袋。)

安：(給榮 cola) 喺。

榮：唔該，請問幾錢？

安：喺度飲定拎走？

榮：拎走咁，我要做嘢。

安：5 毫咁。

榮：喺度飲呢？

安：唔使按樽，4 毫囉。

榮：……咁我喺度飲咁。

(安看一看榮)

(榮給安錢)

喺，呢度 4 毫。

安：多謝。

(安收錢，把錢放入錢箱。榮急急的飲 cola)

(靜，安望著榮)

安：好熱啊呵？

榮：……係……

安：你新嚟㗎？

榮：係……你好。

安：你好，點稱呼呀？

榮：我叫陳富榮。

安：哦！阿榮哥！

榮：唔好咁叫，叫我阿榮得嘞。

安：都係一句啫。

榮：你呢？你點稱呼呀？

安：我叫國安，不過你叫我安記得嘞，啲街坊冚彭爛都叫我安記嘅……

榮：安哥你好。

安：哎咗！唔好咁叫！唔好咁叫！叫安記得嘞！

榮：唔好意思嘅……

安：（傻笑）你喜歡啦。你……以前唔見你咩？

榮：係，我啱啱調嚟呢度。

安：哦！好呀！呢度啲街坊好易話為，一家人咁㗎！啞……做郵差，辛苦咩呵？……
日曬雨淋咁……有冇煙仔？

榮：有。（拿煙）喺。

安：（接過煙）唔該唔該！

（拿了一枝煙，富榮幫他點，點完後安只把煙放在身邊的櫃枱上，猶如是自己的煙一樣）

客氣客氣！

（榮報以一個微笑）

安：阿榮哥你都好斯文喎，呵？

榮：係咩？

安：係。唔聲唔聲咁囉。

榮：對唔住，我唔係好識講嘢……

安：唔緊要！講吓笑啫！冇相竿冇相竿！飲嘢吖，唔阻你。

（榮不知怎反應，笑了笑，然後又尷尬的飲他的 cola）

（他們二人偶然對望，相報以一個陌生的微笑）

榮：（飲完）飲完嘞安哥，還番個樽俾你。

安：好呀，下次再嚟飲嘢吖。

榮：好呀。

（榮背起郵袋，看著枱上的煙）

安：（看到榮，急急的拿回給榮）唔好意思，唔記得咗……

榮：（榮伸手接煙）唔緊要，你鍾意味擺去食囉。（收回衣服袋內）

安：唔好唔好……

榮：係呢，安哥。你呢度係咪 57 號？

安：係！做咩？

榮：你有信。（從郵袋內掏出一封信給安）

安：哦。（接信）唔該。

榮：唔阻你做生意嘞，安哥。我走先。

安：（不惑的看信）哦，好呀好呀，得閒嚟飲嘢吖……

榮：好呀，再見。

安：再見。

（榮離去）

（安從衣袋拿出煙點）

（國安看著信封，打開它，看著信）

（一會）

安：屌！講乜㗎？我都唔識字！

（安把信掉在一旁，繼續百無聊賴抽煙）

（燈滅，投影打出「1976」）

SC2

士多

同日晚上

(國安在看鋪，一會)

(少眉入，步向士多)

安：喂！少眉，要啲咩呀？

眉：安記，俾包南乳肉我吖。

安：好呀！等陣！（安去拿南乳肉）入唔入嚟睇電視呀？

眉：……唔使嘞。（偷看士多內）今晚講到邊呀？

安：紅花會呀！好刺激呀！係呀，你要幾多呀？

眉：3毫子吖。（仍在偷看）

安：（看到少眉偷看電視）喂！入嚟睇吖！做乜鬼嚟出面裝啫？一毫子之嘛！

眉：（縮回身子）唔…唔係呀，我都唔得閒，我要番屋企幫阿媽車衫……

安：賒住先都得嘞！

眉：係？

安：梗係啦！見係你，咪遲啲先俾囉。

眉：……都係唔好嘞，下個禮拜要交學費。

安：你真係好學嘞，女仔之家好似你咁有上進心都好少見嘞，晚晚都番夜學。

眉：唔好笑我啦，安記。

安：唔係笑你呀！你睇我，盲字都唔識多隻。係呀，我有封信睇唔明，你幫吓我得唔得呢？

眉：好呀，不過今晚唔得，搵日吖？

安：（拿著南乳肉回來）好！搵日吖！咁係咁話㗎嘞！

眉：好呀，嚟，3毫子。

安：由佢啦！你幫我睇信，當我請你啦！

眉：咁唔好意思嘅。

安：得啦，你記得嚟得嘞！

眉：……

安：係咁話啦！我聽晚講番今晚啲劇情你聽！

眉：（拿南乳肉）咁我走先嘞。

安：好啦，bye bye！

眉：bye bye。

（少眉轉身走，富榮入。與眉擦身而過，眉離去，榮步到安前）

榮：安哥……

安：（看著眉的方向）殊！唔好嘈。

（富榮不作聲，站著，好奇的看一看安）

（榮再看一看安看著的方向，跟著自顧自的點煙）

（一會）

安：（仍看著眉）你喺度住嘅咩？

榮：哦，係。我搬咗嚟呢頭，所以上頭調我嚟呢區。

安：哦，要啲咩？

榮：你呢度係咪有電視睇？

安：有！一毫子一個人。俾5毫送 cola。要唔要吖？

榮：我淨係睇電視得嘞。

安：隨便你啦，入嚟㗎。（步向開門）你一個人住？

榮：唔係，同阿媽，不過佢唔舒服喇，我唔想嘈住佢啫。

安：（安開了門）哦，入嚟啦。

榮：唔該。

（榮進入士多，安關上門）

（他們在門後，我們看不到人）

安：自己搵位坐㗎，我擺支 cola 俾你。

榮：唔使喇，安哥。

安：唔緊要啦，我請你啦！

榮：咁多謝晒㗎。

安：得啦，你等我一陣。

榮：好呀。

（我們仍看不到人，只見安越過窗口擺 cola）

（安越過窗口步回來，手上拿著支 cola）

（我們只可以從窗口看到電視的光及一些電視劇聲音）

（一會，榮步到窗口，看一看眉的方向）

（榮再回頭吸煙，然後再看著眉的方向）

（燈慢慢的暗下）

SC2.1

第二天中午

巴士站

(燈亮，巴士站，眉在等巴士)

(一會，富榮步入，經過少眉，走到站旁的郵筒)

(榮看一看少眉)

(榮打開郵筒，開始把信放入郵袋)

(榮再看一看少眉)

(榮繼續工作)

(少眉看一看榮)

(榮再回頭看少眉，剛巧與少眉四目相交)

(頓)

(他們客氣的互相笑了一笑)

(榮繼續把信放到郵袋，少眉繼續等巴士)

(榮把信放好，關好郵筒，轉身想離去)

(榮步到少眉旁邊時，停下，少眉看著他)

榮：(客氣地) 早晨……

眉：早晨。

榮：咁晏番工嘅？

眉：係呀，今日番中班，你做郵差㗎？

榮：係呀，…你做盛行呀？

眉：砂廠。

榮：哦，你住呢頭㗎？

眉：係呀，嗰度樓上之嘛。

榮：哦。

眉：你呢？

榮：我住 5 座。

眉：哦，都好近吖。

榮：係……

眉：你好鍾意睇電視㗎？

榮：唔係，尋晚咁啱行開咪睇囉。

眉：哦，我好鍾意睇㗎，不過尋晚睇唔到囉。

榮：哦。

眉：都唔知講到邊嘞。

榮：紅花會吖嘛，陳家洛上到去紅花會。

眉：係咩？咁佢有冇做總舵主呀？

榮：尋晚未講到嗰，不過今晚應該講到嘅。

眉：咁今晚一定要睇嘞。

（榮看著眉）

榮：你真係好鍾意睇電視，係嘛？

眉：我有乜娛樂，放工咪睇下電視囉。

榮：咁又係。

眉：係呢，你今晚會唔會睇呀？

榮：唔知呢，或者啱。

眉：哦。

（靜）

榮：係呢，點稱呼呀？

眉：我叫張少眉，你叫我少眉得嘞。……你呢？

榮：陳富榮。……啞……唔阻你番工，我走先嘞。

眉：哦，好呀，bye bye。

榮：bye bye。

（榮離去）

（眉等巴士）

（燈滅）

SC2.2

第二天晚上

士多

(燈亮，士多，富榮站在士多門前抽煙，一會，看看錶)
(一會，安入坐在櫃枱)

安：阿榮？嚟睇電視呀？入嚟吖。

榮：唔係呀，我想要支 cola 之嘛。

安：哦，喺度飲？

榮：係呀，唔該晒，安哥。

安：(去拿 cola) 都叫你唔好叫我安哥嘞！叫番安記得啦！

榮：唔好意思嘅。

安：有乜好唔好意思吖。(回來) 係呢，你阿媽冇事吖嘛？

榮：都係咁啦，啲老人病。4 毫呵？(給安錢)

安：係呀。(接錢) 多謝。抖吓囉，老人家係咁嘍嘞。

榮：係啦，所以我都諗住飲完番去睇佢。

安：你呢啲孝順仔吖……

榮：唔好笑我啦，安哥。

安：真係唔睇電視呀？今日唔知做乜嘢，冇人，你一個人睇晒嘢！

榮：唔使客氣嘞，安哥。其實我唔係咁喜歡睇電視，尋晚我費事喺屋企嘈住我阿媽瞓覺啫。

安：所以話你好仔呢！
(少眉入)

安：喂！少眉，要啲咩呀？

（榮看著眉）

眉：俾支 cola 我吖，安記！

安：好呀！好快呀吓！（去拿 cola）

眉：（與榮對望）嚟睇電視呀？

榮：（小頓，微笑著點頭）

眉：我都係。

榮：哦。

安：（回來，手上拿著 cola 及信）少眉，你支 cola 呀！仲有呀，我封……

眉：安哥呀，我想睇電視呀！

安：係？好呀！今晚冇人，你一個睇晒……

眉：唔係呀！阿榮哥都睇呀！

安：（向榮）你又睇？

榮：（點頭）

（安有點不悅及不解）

安：啞……入嚟先講吖。

（安步向門後，只見榮和眉）

眉：（向榮）我好鍾意睇鄭少秋㗎。

榮：係咩？

眉：係呀。

(安開門)

安：少眉，入嚟吖。

眉：唔該安記。

(少眉入了士多，榮想跟著入時，安阻止他)

安：阿榮，等陣！

榮：做咩呀，安哥。

安：你唔使返去照顧你阿媽咩？

榮：我諗睇一陣唔怕嘅，其實佢今日都好番好多嘍。

安：說話又唔係咁講呀！老人家嘅嘢，睇實啲好！起身斟杯啤酒洗親就唔好啦！

榮：安哥，我阿媽唔飲啤酒㗎。

安：咁去廁所呢！廁所濕滑跌親就手尾長嘍！你話係咪？

榮：(看著安)……

安：電視嘅嘢，日日都有得睇啦……

(榮頓了一會，安看著他)

榮：咁好啦，我入去同張少姐講聲啦。

安：唔使啦，日日見啦！街坊街里！

榮：……咁好啦，我走先嘍，安哥，再見。

安：再見，好聲行呀！

(安不理榮，關上門)

(榮站在門前，一會，轉身走了)

(門內聲)

眉：安記，榮哥呢？

安：佢話要返屋企睇佢阿媽，走先啫。

眉：係咩……

安：係呀！咁！少眉呀！你咪話幫我讀信嘅？我去擺咩？

眉：唔……

（安步至雪櫃拿回信，我們見到他在窗前）

眉：安記呀……

（安記停在窗前）

安：（起勁）係！

眉：唔好意思呀，我唔記得咗我仲要幫我阿媽車衫，我諗我都係走先嘞……

（安定住）

安：（失望）哦……

眉：bye bye，安記。

安：bye bye……

（少眉開門，步出土多，關門，離開，安記看著眉）

（安記拿著信站在窗前，一會）

（燈滅）

SC3

某日下午

少眉單位門前走廊

(燈亮，少眉單位門前走廊，無人)

(一會，富榮由樓梯步進走廊，開始派信)

(榮派信，過了少眉的單位，正準備派信給隔鄰的單位)

(此時，少眉單位的門開，少眉提著垃圾桶，開閘，步出門外)

(榮不經意的看這人，發覺是少眉)

(少眉正想步去樓梯倒垃圾)

榮：啞……嗯，張少姐。

眉：(回頭，發覺是榮)……係你呀……叫我少眉咪得囉。

榮：嗯，……，唔使番工咩？

眉：冇，見唔係幾舒服，咪請幾日假囉。

榮：哦，呢幾日唔見你去士多嘅？

眉：要返夜學嘛，我去買嘢都唔見你嘅？

榮：係呀，冇咩咪早啲訓囉。

眉：哦……咁你呢幾日咪冇睇電視囉？

榮：其實我都知劇情嘅。

眉：係咩？你都有睇。

榮：係咁嘅，我本身比較喜歡睇小說，呢個劇嘅小說我睇完晒㗎嘞，所以知個結局囉。

眉：係呀？咁跟住點㗎？

榮：由邊度講起㗎？

眉：陳家洛上紅花會開始㗎。

榮：你個晚唔係睇咗咩？

（靜）

眉：啞……我唔記得咗之嘛……

榮：哦。

（靜）

眉：……你好鍾意睇小說㗎？

榮：都唔係嘅，不過睇完小說，覺得電視劇改晒原本啲劇情，我自己唔係咁投入到啫。

眉：係咩？咁原本係點㗎？

榮：好復雜㗎，有排都講唔完。

眉：唔緊要㗎，反正我都唔使番工，你講我聽㗎。

榮：我試吓啦……

（榮放下郵袋，點煙）

（眉亦放下垃圾桶）

（榮點完煙，開始說話）

（眉留心的聽著）

（我們聽不到他們的聲音）

（只見到榮說得起勁，眉聽得陶醉）

（他們說了很久，一個愉快的下午）

（燈隨著他們說話，慢慢的暗下去）

（燈亮於士多，只見安記拿著不只一封的信，充滿希望的等著某人）

（士多燈滅）

SC3.1

另一天中午

少眉走廊

（燈亮，榮身穿郵差服叩少眉的門，手上拿著數本小說）
（少眉應門）

眉：咦？榮哥。（開門出來）有事搵我呀？

榮：唔係咩特別事嘅，不過尋日應承過你話借啲小說俾你睇，咁啱嚟開呢頭派信，咪擺嚟俾你先囉。

眉：（笑）咁點好意思呀？會唔會阻你工作呀？

榮：唔會，不過今日都好多信要派，俾完你我都要走㗎嘞。

眉：哦！咁唔該晒你呀。要你特登擺啲小說俾我。

榮：唔使客氣。（給眉小說）你擺去睇吓啱唔啱睇先吖？

眉：（接小說）多謝你呀，係呢？啲小說由邊度開始㗎？

榮：我揀過㗎嘞，大約由尋日我講到嗰度倒啦。

眉：哦，咁我要快啲睇先得嘞。係呢，榮哥，點解你擺咁多本俾我嘅？

榮：冇，咁我唔知幾時會行開呢頭，如果有信嘅可能幾日都唔經你呢頭，咪擺多幾本俾你，怕你睇完冇得睇嘛。

眉：……你唔係日日都會喺呢頭派信嘅咩？

榮：冇信咪係囉，不過唔知點解你呢座啲信唔係好多，有時我地會儲埋兩日先派囉。

眉：……哦……

榮：係嘞，唔阻你。我走先嘞。

眉：哦，咁多謝晒嘞。

榮：唔多謝，再見。

眉：再見。

（眉回屋裏去）

（榮在單位前）

樓下音：榮！得未呀？唔使收工嘞！

榮：（向音處）得嘞！我落嚟嘞！

（榮急急的走）

樓下音：（隱約）呢頭都有信都唔知你嚟呢頭攞乜呀，忙到死嘞就喺度等你！

（燈滅）

SC3.2

日
巴士站

(燈亮，少眉正把一封信放入信箱)
(她放完，剛好榮入)
(他們碰個正著)

榮：咦？咁啱嘅？

眉：係呀，榮哥，咁啱嘅？嚟收信呀？

榮：係呀。你呢？

眉：冇，咁啱經過之嘛。

榮：哦。(去開郵筒) 係呢，你好番啲未呀？

眉：(看著他開郵筒) 吓？

榮：(收信) 我問你個病好番啲未呀？

眉：好番啲啦，都未好得晒。

榮：咁你記得休息吓嘞。

眉：好呀，有心。

榮：咦？呢度有封信寄去你屋企啲嗎。

眉：係咩？

榮：係呀，不過我唔可以俾你住呀，要攞返去郵局先，聽日派俾你呀？

眉：好呀！

榮：係呢，啲小說睇咗未呀？

眉：睇咗嘞，不過……

榮：不過咩呀？

眉：我讀書唔多，有啲字又好深，所以睇唔晒……唔好意思。

榮：哦……唔緊要。

眉：最衰你又唔喜歡睇電視咩，唔係可以問返你。

榮：係……

眉：唔阻你做嘢，聽日見。

榮：聽日見……

眉：bye bye。

榮：bye bye。

（眉離去，榮呆著若有所思）

（燈滅）

SC3.3

是夜
士多

(燈亮，安記與又多了一些的信，似在等人)

(一會，榮步向士多)

(安看著榮)

榮：安哥，唔該，我想睇電視……

(燈滅)

SC3.4

(燈亮，少眉站於自己的門前，一會，榮步至。他們開始談劇情，十分開心)

(燈滅)

(燈亮，士多，安坐於士多發呆抽煙。身邊只有又多了的信)

(燈滅)

(燈亮，少眉單位前，榮和眉談天，看他們的動作舉止，更快樂、更親切)

(燈滅)

SC4

某日下午
少眉單位走廊前

(燈亮，無人)

(一會，榮步進走廊，他走到少眉門前，叩她的門)

(一會，少眉開門)

眉：榮哥，咁早嘅？

榮：係呀，咁啱呢頭有封掛號信，所以過嚟呢頭先囉。

眉：熱唔熱呀？我斟杯水過你吖？

榮：唔使嘞。

眉：(步回屋內) 唔緊要啦！好閒之嘛。

榮：(自己笑著) 記唔記得尋日講到邊呀？

眉：(屋內) 吓？

榮：冇，(少眉由屋內步出給榮水) 唔該，係呢，你個病見點呀？好番啲未呀？

眉：都好番好多嘞，有心。

榮：如果仲未見好嘅，我屋企有隻藥，都好見效，我阿媽有咩唔舒服都係食佢嘅，你需要嘅話俾我聽吖，我擺俾你。

眉：咁多謝晒喎。

榮：唔使客氣，大家街坊……(榮飲水)

(少眉聽了這句，呆了一呆)

榮：(飲完水) 係呢，我先頭想問你，我地尋日講到邊呀？

眉：……

榮：少眉？

眉：唔？

榮：你冇事吖嘛？

眉：……冇……

（靜，榮看著眉，眉望向別處）

我有啲嘢想問你……

榮：好呀，你講吖。

眉：你知唔知我個病好返好耐。

（眉回頭看著榮）

榮：……係咩。……咁點解你唔番工？

眉：你話呢？

（長靜）

（一些談笑聲於樓梯出現，打破榮和眉的沉默）

（周令祺及張春入，他們是飛仔飛女般的情侶狀）

（他們步到眉和榮前）

春：（向眉）家姐。

眉：唔。

春：（看著榮）你係？

眉：街坊嚟啫。

（榮聽了後有點呆）

眉：（向春）番入去啦！

春：（向祺）我番入去先嘞。

祺：好呀！今晚我嚟接你㗎。

春：係嘞，……走先啦。

祺：……哦……

（仍看著春，春亦看著祺，二人有依依不捨）

眉：（向春）番入去呀！

春：（入屋）知嘞！做咩㗎！（向祺）bye bye。

祺：bye bye。

（走廊只留下三人）

眉：榮哥，唔好意思呀，有機會再傾㗎。

榮：哦。

眉：再見。

榮：……再見。

（眉入屋）

（走廊只剩下榮和祺）

（榮看著單位）

祺：榮哥。

榮：唔？

祺：冇，咁啱嘅？你喺度做咩呀？

榮：你喺度做咩呀？唔使做呀？

祺：榮哥，今日星期日㗎，唔使番工。拍吓拖都唔係好過份啫。

榮：……

祺：係呢，榮哥？

榮：咩呀？

祺：今日放假㗎，你仲著住件制服做咩呀？

榮：……你肚唔肚餓呀？

祺：少少啦。

榮：去食飯㗎，我請你。

祺：咁多謝晒㗎！

榮：行啦。

（榮推祺走）

（祺得意的走著，榮停下，回望眉的單位，然後跟隨祺走）

（一會，眉打開門口，拿著垃圾桶放在門前，看看四周）

（靜）

（眉步回屋內）

（燈滅）

SC5

士多
黃昏

(燈亮，士多，無人)

(電話響，一會，安放下貨品，接電話)

安：喂，安記。……吓？咩話？……你講咩呀？大聲啲吖！我聽唔到呀！……

(鄉下話)吓？阿爸？你找我幹舍？……你說什麼？……什麼阿英？誰來的？……

我聽不到呀！……什麼英呀？……(自言)講乜呀？(鄉下話)是！是！什麼表
妹？我不知道！……吓？吓？聽不到呀！……

喂？喂？挑！

(收線)

(自言)搞乜鬼呀老豆？咩表妹呀？咁貴打長途俾我就係話俾我聽我有個表
妹？……傻㗎？

(拿回貨品，工作)

(自言自語地工作，步離)

(士多不見一人，一會)

(電話再響)

(燈滅)

SC6

夜
街頭

(榮在坐著抽煙，祺拿著一串魚蛋呆看著)
(靜)

祺：榮哥，呢餐飯會唔會太豐盛？

(榮沒有理祺在抽煙)

祺：(向榮)不如再食過咗？

榮：……

祺：榮哥……？

榮：你哋幾時開始拍拖？

祺：咩？邊個呀？

榮：你同少眉個妹。

祺：哦。……幾日前囉……

榮：……你點同佢講？

祺：用口講囉！

榮：點用口講？

祺：(食魚蛋)冇咩點㗎，兜口兜面講囉。得就得，唔得就食七！吓話！唔高興嘅咪算囉。

榮：你估個個都係你咩。乜都講咗出嚟就算。

祺：哇！唔通吓吓擺喺心度呀！好辛苦啫！我就唔得嘞！

榮：人人都好似你咁簡單就好囉。

祺：有幾複雜呀？搵嚟講！認唔認真都係個句㗎啦！起碼我搞掂咗㗎！幾好呀！

榮：我都想好似你咁。

祺：up 乜呀榮哥？

榮：冇。問吓啫。食嘢㗎。

祺：食完啦！大佬！一串魚蛋食成世咩？唔係嘞！都係肚空空咁，不如我請返你嘞！再食過啦！

榮：唔使嘞！我都係走嘞。

祺：咁早呀？睇伯母呀？

榮：唔係。學你話齋，有啲嘢我唔想擺喺心入面啫。

祺：……？

榮：（起身走）唔該晒。

祺：……你有嘢吓話？

榮：冇。走先。

祺。哦。

（榮離開，剩下祺一個不惑的坐著）

（燈滅）

SC7

下一日
少眉單位門前

(叩門聲)

春：(聲) 搵邊個呀？

榮：(聲) 唔該，我想搵張少眉。

春：(聲) 佢唔喺度嗟。你搵佢做咩呀？

榮：(聲) 冇，我有啲嘢想同佢講啫。

春：(聲) 佢番咗工嗟！

榮：(聲) 係咩？佢唔係唔舒服請咗假嘅咩？

春：(聲) 好返啦！佢冇話俾你聽咩？

榮：(聲) ……有……

春：(聲) 有冇咩幫你講低咩？

榮：(聲) ……冇嘞。

春：(聲) 咁使唔使我話俾家姐聽你搵過佢咩？

榮：(聲) ……唔使嘞，……唔該。

春：(聲) 唔使客氣。

(關門聲)

(燈亮，榮站於單位門前)

(一會，他離去)

(蘋果樹 song)

(當榮離去的時候，燈光轉變於集中在在巴士站等車的眉)

(眉若有所思，最後眼睛集中在旁邊的郵筒上，最後，她離去)

（在少眉離去的時候，燈光轉變於集中在士多抽煙的安）
（安沒精打采的抽著煙，伴著他只有從不開啓過的一大疊信，彷彿在回憶著一段說話）

眉：（vo）安哥呀，呢排榮哥有冇嚟過呀？

安：（vo）冇喎，好多日唔見佢啦。聽晚套電視劇大結局，佢可能會嚟睇啫。你有事搵佢咩？

眉：（vo）冇，隨口問吓啫。

（安記擠熄香煙，好像得到什麼決定，一會，他把所有的信丟了）

（靜）

（燈滅）

SC8

晚上
士多

(歡樂今宵再會的聲音)

(燈亮，士多的門關上，安依在窗口前，抽著煙，電視的光照在他的身上)

(他看著電視處)

安：歡樂今宵都做完嘞嗰，你想睇到收台呀？

眉：(門後)唔係，我走㗎嘞。

安：……少眉呀。

眉：咩呀安哥？

安：我叫你幫我讀嗰啲信呢，……我知你有時間幫我睇，……我搽咗嘞。

(靜)

眉：對唔住……

(靜)

安：……唔緊要……

(靜)

眉：我走先嘞。

安：好呀……

(眉開門步出土多，關上門，正想離開)

安：如果我見到佢，使唔使講番套戲個結局佢聽？

(眉站住，頓)

眉：我諗唔使嘞，佢話過俾我聽佢知道個劇情，係我自己唔知，所以先嚟睇啫……

安：你睇完啦，你覺得點？

眉：……………冇乜嘢咁，唔係我想象中咁囉……

（靜）

（少眉離去，安看著她）

（士多燈滅，燈光跟隨少眉的步伐轉移到她的樓）

（少眉步上樓，入屋，屋中燈亮）

（榮於街中轉角步出，看著少眉的單位）

（一會，單位燈滅。）

（榮離去）

（燈滅）

SC9 (2)

士多
接上場

(燈亮，士多門前)

安：你睇完啦，你覺得點？

眉：……………冇乜嘢吖，唔係我想象中咁囉……

(靜)

(少眉離去，安看著她)

(一會，安動身收鋪)

(安已收好鋪，關上門)

(另一邊，陸英入。)

(英一身大陸女子打扮，提著簡單的行李，手拿著一張字條，像在找什麼)

(英看到士多，似有發現，她步上去)

(英看一看門牌，叩門)

(一會，安出來，他看到英)

安：？搵邊個呀？

英：(鄉下話) 唔該，我想搵表哥。

(燈滅)

SC10

冬天一夜

士多

(電視的聲音。一會燈亮，安記士多)

(安在鋪內正悠閑的抽煙看著電視，英在士多門前正辛苦的搬起一袋米，身旁仍有米)

(英辛苦的搬起米，安不理她)

(英把米搬入鋪內，越過安，把米搬上架)

安：(努氣)喂！唔係個度呀！隔離個格咁嘛！講過幾十次啦！

英：哦！（再辛苦的搬米）

安：妖——上面個格呀！呢格擺豉油加嘛！你擺呢度啲豉油擺邊呀？

英：哦！對唔住，對唔住！

安：對咩唔住啫？邊個對你唔住啫？做緊嘢就做啦！講咩嘢啫！

(英搬上架，安回頭看他的電視，不理英)

係嘞，用啲力嘛！唔係你以為落咗嚟就發達咩。快手啲啫呀，唔係天黑都未搬完呀……

(英辛苦，卻不發一言繼續搬剩下的米)

(一會，祺入)

祺：喂！安記！

安：喂！點呀！大炮祺！又蛇王呀？

祺：幾夜呀？收晒工啦！

安：講吓笑啫，咁燥做咩啫？放工都唔拍吓拖？走嚟搵我咁好死呀？

祺：鬧交呀。

安：唔怪之得啦。“尋日就攞埋一舊，今日就一條閘頭”。

祺：挑！唔好講嘢！擺支啤酒嚟飲吓吖。

安：好呀！（向英）阿英呀！擺支藍帶嚟吖！

（英正吃力的把米抬上架，不能動彈）

英：哎……表哥呀，我……搬緊米……

安：搬緊咪放低囉！擺完支啤酒再搬過囉！

英：哦……（非常吃力的放下米，去拿啤酒）

祺：安記，冇見一排，娶咗老婆都唔出聲呀？阿嫂都幾有福相吖……

安：聞住！唔好亂 up！表妹嚟嘅！（點煙）

祺：表妹？咁你就唔係啦！啲米咁鬼重你叫個表妹搬？你係咪人嚟呀你？

安：哇！你鋪話法！唔使做呀？喺上面游水落嚟㗎。唔係我老豆逼我照顧佢？我話之佢啦！唔叫佢搬番啲嘢點回本呀？

祺：又唔好咁講，話晒都一場親戚吖，邊有得咁計㗎。（英剛好拿啤酒到他們身前）唔該。

安：（一手拿了啤酒來飲）親戚又點呀？幾百萬未開頭咩！養多個人好貴㗎！

（英難堪的站著不知怎反應）

祺：（看到英）你表哥講笑㗎咋，（向安）你又係嘅，嚇親人呀！

安：邊個同你講笑呀？我句句都認真！（飲）最好就快啲走！唔好喺度阻住個地球轉！吓話！

（英極度難堪）

英：對唔住，我唔舒服，我返入房先……（急步離去）

安：（向祺）噏！係咪呢！話兩句又會唔舒服嘅！唔知點嚟嘅。都話啲大陸妹唔捱得㗎啦！……

（祺看著安）

祺：唉——安記，我都走嘞……

安：咁快？都未飲完。

祺：（起身走）唔飲嘞，我驚再同你傾落去我會變成一隻禽獸。

安：挑。有冇咁嚴重呀？……俾錢呀！

祺：我都有飲過，得你飲之嘛！俾你個頭！

（祺走了，安無言的指罵他，自己坐下不忿氣的飲酒）

安：我係禽獸？你都傻嘅！

（他瞄一瞄英的方向）

安：（回過頭來，不屑地）挑。

（他又喝下一口啤酒，若有所思，跟著便看一看士多外英未搬好的米）

（他看一看英，再看一看米）

（一會，他起身步向米前停下）

安：（用腳碰一碰米）有幾重呀？

（他彎身嘗試抬起米，搬不起，又站回起身）

都幾重呀吓。

（靜，他再看一看英的房）

（他彎身開始搬米）

（燈滅）

SC11

第二天早上

士多

（燈亮，安在士多自己幫自己搽正骨水）

安：嚟……唔係吓話。搬幾袋米就周身骨痛嘅？……哇……攞命攞命！咁……

（英由房出，安記聽到英的聲音，急忙把正骨水收起，扮得冇事一樣）

英：（出來）……表哥……早晨……

安：……唔……

英：尋晚……對唔住……

安：你知自己唔啱咩？郁啲就流馬尿，大小姐呀？

英：唔係……

安：唔係唔係！唔係就唔好咁！香港地呢，乜都要捱嘅，唔辛苦點得世間財呀！呢個道理你懂唔懂呀？

英：懂……懂……

安：懂呀得啦！以後唔好嘞，做嘢啦。

英：哦……（英動身想做嘢）

安：喂！

英：咩呀？表哥？

安：你食咗早餐未呀？

英：未……

安：所以話你呢！唔食嘢邊有力做嘢呀？食咗嘢先啦！冇厘醒目！廚房有嘢呀，自己煮嚟食啦！

英：哦……（去廚房）

安：喂！

英：吓？

安：煮兩份呀！我肚餓呀。

英：哦……

（英去廚房，安這時才有時間表露他的痛楚。英經過上場放米的地方）

（大驚）呀！弊嘞！

安：（走出去）咩事？咩事？

英：呀！表哥，啲米唔見晒呀！係咪我尋晚冇搬番入去，俾人偷咗呀？（十分緊張）
對唔住呀！我……唔想㗎！對唔住呀！我又做錯事！……我……

安：唔係唔係！（英仍在焦急說話不停，安只好喝止她）你冷靜啲先！

英：（定）哦。

安：啲啲米呀……就呀……

英：就點呀？表哥？

安：就……就今朝一早俾人買晒嘞……所以就有晒嘞。

英：係？成幾十斤啲嗎！咩嘢人咁早嚟買咁多米呀？

安：（不知怎應對）啞……你唔好理咩！香港人鍾意食飯咁嘛！

英：咁你啲香港人真係富裕嘞！

安：得嘞得嘞！唔使總結嘞！去煮嘢啦吓！（推英走）

英：哦！好！好！

（英離去，安看著他離去）

(他自己也失笑，但才發現自己腰痛，又走回去搽藥酒，位置剛好背着英的方向)

安：哇！你老味！慘過俾火燒……哇！……

(在安自言自語的時候，英拿着一扎菜回來，正想問安東西，但見安自言，便停下)

幾廿斤米真係唔係人咁品，……唔係嘞，下次都係叫番十斤，分開幾包，哇！

(英看在眼內，微笑。再步回廚房)

(燈滅)

*****第一部份完*****

第二部份

SC1

寒冬一夜

士多

(燈亮，櫃枱上放了碟餸，英正從廚房拿着一碟餸出來)

(安從另一邊入，他走到士多)

英：晚安。要 D 咩呀？

安：俾支 cola 我吓。

英：哦。(去拿 cola)

(回來)

安：幾錢呀？

英：五毫吓。

安：五毫？我喺度飲嗰！

英：哦……

安：咁喺度飲幾錢呀？

英：啞……三毫……

安：三毫？

英：……係……

安：咁平？抵飲嗰！

英：……街坊生意嘛……

(頓，安嚴肅的看着英)

安：街坊生意唔使賺呀？送埋個橙俾佢好冇？

英：……

安：好冇？

英：……唔好……

安：唔好就記實啦！四毫呀！

英：哦。

安：哦哦哦！試多次啦！

英：哦。

（安走回他先前出的位置）

安：（邊走邊自言）三毫子買支 cola。開善堂咩。仲話學人睇鋪……

（燈隨着安走時暗下）

（燈亮，櫃枱上放了碟餸，英正從廚房拿着一碟餸出來）

（安從另一邊入，他走到士多）

英：晚安。要 D 咩呀？

安：俾支 cola 我吖。

英：哦。（去拿 cola）

安：喂！擺返頭先嗰支得啦！又開支新，你想我死咩！

（英從雪櫃下拿回先前的 cola）

安：幾錢呀？

英：五毫吖。

安：五毫？我喺度飲啲！

英：哦……

安：咁喺度飲幾錢呀？

英：四毫。

（安看着英，有點欣慰的笑起來，但掩飾着）

安：真係四毫？

英：係！

安：好啦，收錢啦。

英：唔使嘞……

安：吓？

英：唔收你錢咁。我請你飲。

安：……你唔係吓話？頭先就收少錢，家吓直頭唔收？

英：送俾你飲㗎，表哥。我係上面落嚟冇乜錢，送支汽水過你飲，當多謝你咁。

（靜）

安：甜爺爺，冇乜好飲呀。啞……食飯啦……食飯啦。

（二人去食飯）

（燈滅）

第二部份

SC2

接上場

（電視的聲音。燈亮，安和英正在先前擺餸的櫃枱吃飯，那支 cola 放在安旁的枱上，他吃飯時偶爾會飲一飲那支 cola）

（安邊看電視邊自顧自的吃飯，英則慢慢的）

（一會，安看到英）

安：喂，食嘢㗎。

英：哦。

安：（夾了一舊雞給英）食舊雞㗎，呢排天口涼呀，食多啲嘢，重有呀著多件衫呀。

英：哦。

（靜，他們在吃飯，英看一看安）

英：表哥呀……

安：（看着電視）唔？

英：你又話天口涼，咁你又唔着多件衫？你唔怕“攝”親咩？

安：嘩。我哋呢啲吓話！鐵打加嘛！冇病冇痛嘅！

英：係咩？

安：梗係啦！你落嚟咁耐冇冇見我食藥打針搽藥酒咁㗎？

英：……冇……

安：（吃完飯，放下碗筷，點起飯後煙）咁咪係囉。我食完嘞。

（起身步向錢桶拿錢）

英：表哥呀……

安：咩呀？

英：咁我可唔可以看鋪呀？

（安沒有看英，只在錢桶內拿了些散錢，數着）

安：等我諗吓。

英：哦。

（安將錢袋起）

英：表哥，你去街呀？

安：係呀，我約咗呀大砲祺地打牌。你食完執埋啲嘢洗埋碗佢啦吓。

英：吓？咁邊個睇鋪呀？

安：……你洗碗唔使洗好耐啫，吓話？

（安拿了 cola）係咁啦。

（安離去）

（英自己在吃飯，看一看這間士多）

（燈滅）

第二部份

SC2.1

某日下午

少眉單位門前走廊

(燈亮，榮正在少眉家的鄰近單位派信)

(少眉從自己的單位步出)

(他們二人碰個正着)

榮：……你好……

眉：你好……好耐唔見……

榮：係……

眉：……嚟派信呀？

榮：係……你咁晏嘅？返中班呀？

眉：係……係呢，伯母呢排見點呀？

榮：都係咁啦。有心。……係呢，我俾你嗰幾本小說，仲有冇睇過呀？

眉：冇嘞。

榮：哦……

(靜)

眉：啞……既然你喺度，不如我俾返你咩。你等我一陣。

榮：哦……

(少眉入屋，走廊只剩下榮)

(一會，眉從屋內出來，手持那幾本小說)

眉：榮哥，俾返你。

榮：唔該。

眉：唔好客氣，我唔好意思就真。……我要返工，走先嘞。Bye bye。

榮：bye bye。

（眉離去，只剩下榮拿着小說站着）

（一會，榮也失望的離去）

（燈滅）

第二部份

SC2.2

SC2 翌日

士多

（燈亮，士多。英急步從廚房處拿着一碗很熱的藥走回士多，她把藥放到櫃枱，做了一個冷卻雙手的動作，便走向房處）

英：（聲）表哥呀，起身嘞，啲藥啱飲㗎嘞。

安：（聲）吓……？

英：（聲）起身嘞，飲藥嘞。

安：（聲）哦……

（安從房步出，他樣子病得不似人形。身上披着全張綿被，他走到櫃枱坐下，英跟着他）

英：你見點呀？

安：好慶……

英：咁你飲咗碗藥先啦。

安：……咩藥㗎嘞……？

英：感冒茶。

安：吓？（起身走）唔飲嘞……唔飲嘞。

英：唔得㗎表哥，唔飲唔好㗎！

安：苦呀……苦呀……

英：表哥，我煲咗好耐㗎嘞！

安：你煲咗好耐之嘛，關我咩嘢事㗎！唔飲呀！

（安步回房內，只剩下英失望的站着）

英：……咁好啦。……我去買餸嘞。

（英失望的走了）

（一會，安步出來，拿起那碗藥，喝完，步回房間）

（燈滅）

（燈亮，英拿着餸站在櫃枱前，看着那碗喝完了的藥）

（一會，燈滅）

第二部份

SC3

士多

某日下午

(燈亮，士多。英正在看鋪，安不在)

(一會，榮入)

英：你好，要啲咩呀？

榮：你好。我想買袋米。

英：好呀，要幾多呀？

榮：兩斤咁。

英：好呀！你住邊咁？一陣送俾你咁？

安：我有榮哥地部嚟嘞。

(安從房間步出，他看著榮，榮和英也看著他)

英：表哥，你唔抖吓？。

安：(看著榮)唔使嘞，我見到阿榮精神好多嘞。

榮：安哥，你好。

安：榮哥，咁耐唔嚟，乜咁錯蕩呀？

榮：冇，屋企就嚟冇米，咪嚟買囉。

安：咁仲有冇嘢要咁？

榮：冇嘞。幾錢呀？

安：唔使啦。送貨時先俾啦。

榮：係呀安哥，如果你唔舒服，其實啲米我都擺得到嘅，我諗唔使你特登送俾我咁麻煩嘞。

安：唔緊要。我叫阿英送啫。唔麻煩。

榮：咁好啦，唔阻你做生意。

安：唔阻。得閒咪嚟睇吓電視囉。係嘞，唔記得咗你唔鍾意睇電視個呵？

榮：（榮看着安）我走先嘞安哥。再見。

安：再見

榮：（向英）再見。

英：再見。

（榮離去，剛好少眉入。榮和眉停下對望）

（安也留心的看著，英也奇怪的看著安）

（四人靜了）

榮：咁啱嘅……嚟買嘢呀？

（眉沒有回答榮，只靜靜的越過他，步向士多）

（榮定定站着，眉步到士多，停下。）

（安看著眉）

（英看著安）

（一會，榮只好走了）

（靜）

安：嗯。……少眉……嚟買嘢呀？

眉：係……我想要包米……

安：要幾多呀？

眉：兩斤咁。

英：咁啱嘅，頭先榮哥要兩斤，你又要兩斤……

安：（啤著英）好啱咩？買米梗係買兩斤㗎啦！唔通買兩粒呀！

英：係……

安：（向眉）一陣送貨俾你。

眉：唔該。

安：唔使。

眉：bye bye。

安：bye bye。

（眉離去，安看著他離去）

（一會）

英：（安仍看著眉）表哥呀，你唔舒服，咁我一陣送埋俾佢啦。

安：唔使嘞，兩斤咁重……等我送咗。（他步回房）

（英看著安，失落。燈轉暗）

SC3 轉 4

（vo 隨着士多燈暗而出）

安：（vo）少眉呀，兩斤米呀。你簽簽收咗。

眉：（vo）唔該安記。

安：（vo）唔使。係呢？你呢排得唔得閒呀？

（燈隨 vo 聲轉亮於少眉單位門前）

（靜，一會，安由少眉單位步出，關上門，頹然的離去）

（燈隨着他離去而暗下，轉亮於士多，接 SC4）

第二部份

SC4

接送貨後

士多

(燈轉亮，士多，英正在看小說，身邊有一碗藥，她雖在看小說，但並不專心，偶爾望望藥，偶爾望望街)

(安步回來，有點醉意)

安：睇咩呀？唔使做呀？

英：咦？表哥。你返嚟嘞？咁夜嘅？我擺碗藥過你吖。

安：我問你喺度睇咩呀？

英：睇小說。先頭我送米俾榮哥，講起睇小說，佢話有幾本唔要，所以送俾我啲。

安：又係睇小說……你識睇咩？

英：我識睇㗎！

安：插圖呀？

英：唔係呀，內文呀。

安：你識字咩？

英：我識㗎。

安：你識？你讀過書咩？

英：讀過……

安：幼稚園呀？

英：高中……

(安呆了)

英：我高中畢業㗎。

安：……你講真㗎？

英：係。

安：咁又點呀？好叻呀？

英：唔係……

安：唔係唔係！你個樣好係啦！識字好叻呀？咪又係要靠我，唔係我你踏街啦！

英：表哥你可唔可以唔好咁講嘢呀？

安：咩呀？唔啱咩而家？你哋識字就可以講嘢呀？我唔識字就唔講得嘢呀！

（英看著安，安看著英）

安：（拿起小說）以後唔好俾我見到睇書。

（靜，二人對望）

（安放下小說，步回屋內離去）

（英在士多內，燈滅）

（燈光轉換，榮在單位內抽著煙，一會，他拿起筆寫信）

（燈滅）

第二部份

SC5

上場翌日晚

士多

(燈亮，安在士多看公仔書)

(一會，英回來)

(他們尷尬的對望，一會)

英：……表哥……

安：……唔……

(靜)

安：……送完貨呀？

英：……係……

(靜)

英：表哥，冇咩嘢我返入去先嘞。

安：……哦……

(英步回士多內)

(安不知怎說話，只好再看著公仔書)

(英去拿跌打酒，坐下，自己雞手鴨腳搽起上來。)

(一會，安看到英)

安：搞咩呀？

英：冇，頭先送貨唔小心扭親。

安：使唔使我幫你呀？

英：唔使。我自己得嘞！

(英繼續搽，但仍雞手鴨腳搽不到痛處)

(安看著看不過眼)

安：(走到英身邊) 唉。咁唔得嘅。擺嚟喇。

(安拿了英的跌打酒)

安：搽正骨水呀！唔係咁搽㗎。

英：係咩？

安：係！噏！首先你唔好倒咁多。(他一邊說一邊示範) 你睇我。倒少少，噏點少少呢，隻手呀，要啱啱兜得住唔瀉。就好似咁！多啲少啲都唔得嘞！然後呢，要用隻手指尾搞一搞佢，唔好用第隻手指嘞。唔勻呀！要用手指尾。

英：手指尾。

安：跟住呢，噏你見到勻晒喇。咁呢，又唔好心急嘞。你坐過嚟。

(英坐在安對面)

安：擰轉。

英：擰轉呀？

安：擰轉！

英：哦。

(英擰轉身子，背對安坐著)

安：呢個時刻呢就好重要嘞！唔能夠太快呀，但亦不能夠太慢！要一吓拍上去呀！一滴都唔好溜。你拿高少少件衫。

英：(不好意思) 吓？

安：嚟吖！拿吖！唔係點搽呀！

英：哦。(害羞的拿高衣衫)

安：嚟嘞喎！

英：哦。

安：（安快速的拍在英背腰上）我悽！

（英被他突然而來的一下也嚇得動了身子，安則努力的搽）

係咪好啲呀？

英：唔……

安：邊有人好似你咁水皮㗎！咁易扭親。我呀！做咗十幾年都有話有事嘅。

英：一次都有？

安：唔係你估！不過扭親腰骨呢啲嘢呢可大可小呀！好彩你遇到我……

英：表哥呀……

安：點呀？

英：其實我扭親腳呀……

（頓）

安：哦……我知呀！……所以話你唔識呢，搽跌打酒呀就唔能夠直接搽喺個患處度㗎，要搽遠少少等啲藥力滲透過去㗎。我咁講你明啦？

英：明……明……

安：明就最好啦！呢啲高深嘢唔係個個明……

（靜，英不作聲，安仍在搽，一會）

（他們二人都忍不住笑起來）

安：（笑著，死死地氣）擰返過嚟㗎。再搽過。

英：哦。（英擰回來）唔使再……（用手指尾比劃著）撩個嘞呵？

安：唔使㗎，撩一次夠用㗎嘞。

（安再幫英的腳搽跌打酒，英看著他）

（安偶爾看到英，英別開了面）

（靜）

安：（一邊搽）尋晚呢……我飲多兩杯，咁呢……

英：得㗎嘞，……知㗎嘞……

（靜）

安：啲小說好唔好睇呀？

英：（緊張）我有睇嘞！

安：唔使咁驚……讀書好吖。唔通好似你表哥我咁好咩。收錢都係認顏色。

英：都唔係咁講嘅，

安：我話係咁講就係咁講啦。你第日如果擺到身分證呀！唔好屈喺度嗰呀！

英：唔係呀，其實喺度做嘢都幾開心吖。

安：有幾開心吖傻妹！你啲高中生嚟㗎嘛！讀到高中就梗係要搵份好工㗎啦！

英：我覺得呢份工好好㗎嘞。你對我都唔錯呀。

安：係咩？……有事㗎嘞！（放手）得㗎嘞。抖下有嘢㗎嘞！

英：唔該表哥。

安：（起身）我入去洗埋對手𦘔嘞。你𦘔未呀？

英：未呀，我仲想睇吓書。

安：咁你自己睇書啦吓。睇完熄燈啦。

英：哦。

安：唔好睇咁夜呀！聽朝早仲要送貨㗎。早抖嘞。（安離去）

英：“煮”抖。

安：早抖呀，煮抖。落嚟咁耐都講唔正，搵人教吓你啦。係咁啦。

（安離去）

（留下英一個在士多，她失笑）

（燈滅）

（燈光轉換，眉的單位）

（榮步入，在眉的單位前放下了一封信，然後離去）

（一會，眉回家，在家門看到這封信，她打開它，看著良久）

（燈滅）

第二部份

SC6

士多

下午

安：（聲）洗頭水。

英：（聲）死頭咀。

安：（聲）你鬧人呀？洗頭水呀，唔係死頭咀呀！講多一次啦！

（燈亮，安和英在士多，安正教導英講廣東話）

英：死——頭——咀。

安：算嘞。算嘞。學過第二個嘞。啞……（看著士多內的貨品）曲奇餅。

英：曲奇炳。

安：曲咩奇炳啫？人嚟㗎？你好掛住佢咩？曲奇餅咁嘛！講多次啦！

英：（辛苦地）曲奇炳。

安：又炳邊個呀？你好多仇家咩。曲奇餅咁嘛，食加嘛。唉，講個易啲嘞。

英：哦。

安：你好！

英：你口。

安：你好呀！咩你口啫？你理人地個口做咩啫？人地個口有咩關你咩事啫？唉。你自己練吓先嘞。

（安沒好氣的行開看電視）

英：喂！喂！表哥，唔好行咗去吖。返嚟吖！

安：咁係咁嘛，又要人教你講廣東話，自己都唔練吓嘅。你練好啲先嘞。

英：死——頭——女。

安：（看著電視）水呀！女咩呀又，有冇仔呀？

英：洗頭——水。得嘞。表哥，過返嚟吖。

安：（回來）係咪得嘍？講嚟聽吓？

英：洗頭——稅。

安：洗頭都要交稅？你洗嘞！再嚟過啦！

英：哦。

安：邊有人好似你咁嘍！講句嘢都講唔掂，蠢到死，邊有人咁簡單嘅嘢都唔識嘍！？……

（燈隨着安說話暗下）

英：（正常廣東話，聲）哥哥上學去……妹妹上……

安：（聲）唔好咁快！唔好咁快！

英：（聲）得未呀？

安：（聲）講多次啦！

（燈亮，英正拿着一本小學中文，安則伏在櫃枱上默書）

英：哥哥上學……

安：嗯嗯嗯！唔好咁快！

英：哥哥……

安：唔好咁快！

英：哥哥你都唔識呀？邊有人咁蠢嘍！咁簡單都唔識。你有冇溫書嘍？

安：有嘍！真係有嘍！

英：有點會唔識啫！唔等嘞！你留空佢嘞。

安：吓？

英：哥哥上學去，妹妹上學去……

安：喂！唔好咁快！唔好咁快……

（他們仍繼續練習，良久，燈滅）

第二部份

SC7

士多

某日下午

(燈亮，士多，無人)

(一會，安鬼祟的出來，四看)

(他發覺無人，便拿出跌打酒搽)

安：(這次到他雞手鴨腳，因為他傷了背部)哇！……嚙……哎……

英：(突然由安背後出來)表哥。你扭親呀？

安：啞……啞…………係。

英：你又話你唔會受傷嘅？

安：咁呀！……英雄都有落難時嘛。吓話？

英：咁又係。使唔使我幫手呀？

安：我自己得啱嘞！你睇書啦。

英：哦。(英坐在櫃枱看書)

(安努力的搽，但仍搽不到痛處)

(英關心的看著他)

安：(發現英)得嘞！我自己得嘞！你睇書啦！

英：哦。

(安努力的換了多個姿勢仍搽不好，英關心的看著他)

英：表哥呀，不如我幫你搽咩？

安：吓？……唔好嘅……

英：唔怕啦。你都幫過我。

安：唔使哩……

英：唔緊要啦。擺嚟啦。

安：……哦……（安尷尬的給英跌打酒）

英：（坐下）邊度見痛呀？

安：（指著）呢……呢度度啦……

英：哦。（倒跌打酒落手）嚟喇嗎？

安：（緊張）哦……

（英只將手放上安的背部，還未用力，安已發出了一吓怪叫，很明顯他不慣給女人摸）

安：HA……

英：（笑）表哥，好痛呀？我都未用力。

安：唔……唔係呀……

英：咁你叫嘅？

安：冇……叫吓習慣吓之嘛……

英：哦，咁我繼續搽個喇嗎？

安：好呀……

（英繼續搽，安卻在不經意間又發聲又避開）

英：（笑）表哥呀，你咁樣好難搽個嗎。

安：係……係咩？

英：係呀。

安：咁呀，咁你講啲嘢呀，分散我啲注意力……HA……

英：講咩呀？

安：講咩都好啦……睇開咩書呀呢排？

英：啞……好多個啲……

安：求其講本……AH！

英：嗯……咁我呢排睇開本小說幾得意㗎，唔係好多字㗎咋，又多圖畫，我擺俾你睇
咁！

（英想起身擺）

安：唔好！繼續搽！繼續搽。

（英笑了一笑，又坐下搽）

（安也十分陶醉）

英：（笑著）有冇好啲呀？

安：好啲，好啲……（向英）不過未好得晒㗎！

英：咁搽多一陣好冇？

安：好好。

（靜，他們在搽）

安：咁，其實你點解唔睇多啲有用啲嘅書啫，例如啲咩教人見工呀啲啲咁嘢呢？

英：我想㗎，不過唔係咁方便出去買，所以咪冇睇囉。

安：咩書咁大支嘢呀？要買。

英：英文書㗎，好似叫咩嘢…Business Letter。

安：哇！雞腸呀！哎，咁想幫都幫你唔到嘞！

英：唔緊要啦，我自己搵得啦。其實表哥你都幫咗我好多嘞，我唔該你至真。

(安冇反應)

英：表哥？

(英伸前身子看安，發現安已睡著了)

(英笑了笑，停下)

安：(合上眼)好痛呀，唔好停呀……

(英再幫安搽)

(燈滅)

第二部份

SC8.1

某晚

士多

(燈亮，祺和安坐在士多吹水)

(祺「落力」的食花生及飲啤酒，安則抽著煙呆著的想什麼)

(一會)

安：我思疑我表妹佢喜歡我……

祺：(大驚)哇！安記。夜媽媽唔好講鬼故咗！

安：噏咩呀？

祺：唔係咩？阿英好人好姐鍾意你？撞邪呀？

安：(拿花生掉祺)挑！我好失禮咩而家？

祺：呢啲唔係叫做失禮。叫影衰！

安：你仲講嗰！（作狀打他，祺忍笑的點煙，安飲酒）我呀！假假地都係士多老細呀！大喬家呀！

祺：大傷風呀！

安：咗！我踩親你條尾呀？空頭空勢！認真啲咗！

祺：我好認真呀！噏！你話阿英鍾意你咗嘛……

安：我思疑啫。

祺：得啦！差唔多啫！咁呀！我問你，佢鍾意你啲咩咗？

安：我點知呀？……可能我靚仔啫。

祺：講認真呀！都話夜媽媽唔好講鬼故嘞！鍾意你啲咩呀？

安：我點知啫！

祺：咁咪係囉！你都唔知自己有乜好，唔通佢幫你搵呀！你估尋寶呀而家？

安：超！你咁醒呀！你知唔知阿少眉個妹鍾意你啲咩呀又？

祺：知唔知又點啫？都唔關我事啦！

安：點唔關你事呀？你哋打得火熱啲！

祺：散咗好耐啦……

安：……吓？唔係吓話？幾個月咋啲。

祺：唔夾就唔夾㗎啦！邊有時間分㗎！

安：……咁點呀？冇咩咁嘛？

祺：有咩啫？冇嘢㗎！十八年後又一條好漢！

安：得嘞！知你醒嘞！咁有冇咩新目標呀？

祺：有就有嘅，不過……

安：唔使不過啦！多個人犧牲啦！

祺：頂你啦，今次認真㗎！

安：你條友都會認真？

祺：唔係呢，今次真係……

安：噏！我信你呀！

祺：挑！唔信算。我使你信！

（祺飲啤酒，安看著他，靜）

安：喂。

祺：咩呀？

安：喂！即係咁，你話你認真咩。

祺：梗係啦！

安：咁你認真呢。你……你會點呀？

祺：認真愛佢囉！

安：唔係呀！即係你會點……點話佢知呀？

祺：對佢好啲囉……

安：頂你個肺！點對佢好啲啫？你講清楚啲呀！

祺：睇吓佢想點囉！想要啲咩咪借啲意送俾佢囉！

安：係？

祺：係！……你有心上人咩？安記？

安：冇……梗係冇啦！我啲浪子嚟㗎嘛！隨口問吓之嘛！咩係！有啲嘢想你幫幫手！

（安步回士多）

祺：咩呀？

安：（從士多拿了一大疊英文書出來）喂！你幫我搵啲嘢呀！

祺：咩嘢呀？

安：你幫我睇吓，呢度有冇本書叫 B…乜鬼嘢 TER！

祺：B 乜鬼嘢 TER 呀！哇！你喺邊度搵埋咁多英文書㗎？

安：你唔好理我呀！你幫我睇呀！你識英文咩嘛。

祺：點睇啫？講乜先得㗎？

安：講乜呀？好似話……好似話教人寫啲唔知乜春見工信呀咁啲嘢囉！

祺：哦……（抽了一本出來）係咪呢本呀？

安：我點知係咪呢本啫！講乜先得咩？

祺：Business Letter 囉！教人寫見工信咁嘛！

安：（急忙收起）咁係嘞！

祺：喂，安記，不過呢本嘢好舊個嘞喎！唔啱用個喎！呢啲書你喺邊度搵㗎？

安：肥強個舊書檔囉，平咁嘛！

祺：哦！邊個要本書呀？

安：阿英囉。

祺：阿英？

安：唔係，都唔係嘅，咁我咁啱行過肥強個檔口，佢話唔要嘞。我見咁平咪順便擺返嚟睇吓有冇用囉！吓話？無謂咁咩！

祺：哦！咁你諗住送俾佢呀？

安：挑！都話平囉！我諗住擺嚟攝吓枱腳之嘛。咁得閒送俾佢咩！

祺：真係？

安：真！對佢咁好做咩呀？費事佢真係愛上我就弊嘞！吓話？你唔好同佢講呀！，你知啦！……佢誤會唔好嘛！係咪？

祺：哦……你真係唔係送俾佢？

安：（很開心）都話唔係嘞！嚟咩！飲酒咩！（幫祺斟酒）不過你聽朝要返工使唔使早啲抖呀？

祺：都唔使嘅……

安：都唔係呀，飲多杯好返去馴嘞！……

（安催促著祺飲酒）

（燈滅）

第二部份

SC9

士多 接上場

（安抽著煙，很興奮的拿著那本 Business Letter，等著英回來）
（一會，英回來，手上拿著一膠袋，安急忙地把自己的書收在貨架上，回到原處扮作若無其事）

英：表哥。

安：英。返嚟嘞！

英：係呀。做咩呀？有事搵我呀？

安：（神氣地）都唔係嘅！有啲好嘢益你咁啦！

英：係咩？係咩呀？

安：超！有咩吖！正所謂踏破鐵鞋無覓處，得來全不費功夫！

英：咩嚟㗎表哥？神神秘秘咁！

安：哈！犀利嘞！你咪話想要本 B 乜鬼嘢 TER 咁嘅……

英：係呀！我以為我呢世都搵唔到呀。

安：哈！係哩！咁你真係估都估唔到呀……（正想拿出來）

英：我真係估唔到呀！（從膠袋內拿出一本最新的 Business Letter）你睇吓，今日有人送俾我嗰！

（安定住呆了）

安：……？

英：表哥你睇吓，仲係最新版嚟㗎！

安：……邊……邊個送俾你㗎？

英：祺哥囉！我先頭送貨俾佢，吖！唔知點解佢好似知道我需要呢本書咁，話送俾我
嗶！我都話唔好意思㗎嘞，不過佢話佢冇用嗶，咁我咪要咗佢囉。

安：……哦。

英：表哥，你唔會怪我立亂要人啲嘢啲呵？

安：……唔……唔會！咁咪好囉！吓！讀書好嘛！……吓！咁你想要就有嘞！咁……
咁好吖！吓話！……咁！……咁咪要咗佢囉……

英：表哥你咁講我就放心嘞。我幾驚你唔高興呀。

安：點會啫！我似啲咁嘅人咩！

英：唔似。

安：咁咪係囉……

英：係呢，表哥呀？

安：吓？

英：你先頭係咪話有好嘢益我呀？咩嚟㗎？

安：啞……冇！啞……我見呢排士多唔係咁忙，咁諗住放你假，俾你抖吓咁囉。

英：（高興）係咩？多謝你呀表哥！其實我落嚟咁耐都想週圍去吓㗎，不過我唔方
便吖……啞……不如表哥你同我一齊去吖？

安：唔好嘞！唔使做咩！你放假之嘛，又唔係我，你自己玩得開心啲啦。……啞……
我眼瞓，我瞓先。……早抖……

英：早抖……

（安步回睡房離去）

（英看著他）

祺：（vo）英呀，阿祺呀。冇，我知你今日放假，咁啱我都係，不如我同你出去玩吓
吖？

英：（vo）唔好嘞祺哥，我唔想士多得返表哥一個嘍度，我想留嘍度幫佢手呀。……
下次先啦。多謝晒。

（燈墮著 vo 漸暗）

第二部份

SC10a

夜

少眉單位門前走廊

（燈亮，榮又再將一封信放於少眉門前，放好後，他離去）

（在榮離去的時候，剛好眉回來，他們再一次碰過正着）

眉：係你呀。

榮：係……咁夜嘅？

眉：啱啱收工。（她經過榮，步回單位）你呢？你又咁夜嘅？（她發現信）

榮：我咁啱探個朋友之嘛……

眉：（拿起信）係咩？

榮：係……唔阻你休息，我走先。（他想離去）

眉：榮哥呀？

榮：（停住）吓？

眉：冇，我呢排收到好幾封信，但係又有寫低係邊個寄嚟。我想問吓，其實你會唔會知之嘛。

（長靜）

榮：我唔知。（動身離去）

眉：點解嗰個人唔同我講？

（榮停下，靜）

榮：我諗如果佢覺得講咗出嚟會對你好嘅話，佢會講。

眉：佢點知呀？或者我唔介意呢？

(靜)

榮：我以前都唔介意，直至我發覺我飲支汽水都要喺士多飲唔敢拎走，我開始知道，唔到我唔介意。

(靜，榮離去，剩下眉)

(蘋果樹 song)

(燈滅)

第二部份

SC11

士多 夜

(蘋果樹的歌聲漸變成收音機音聲)

(燈亮，安失意的坐在士多，喝著悶酒)

(只有這首歌伴著他)

(一會，安發現沒有了酒，入去拿，我們見不到他)

(忽然，歌曲終斷，響起特別新聞)

報導：特別新聞報導，經多番考慮，香港政府決定於明日零晨零時零分開始，實施特赦政策，為期二十四小時，請各非法入境者於限時內到各人民入境事務處登記，逾時者將不獲處理，並即時遞解出境。特別新聞報導完畢。

(收音機回復音樂。靜，一會)

(安突然發瘋似的走出士多)

安：英！

(燈滅)

第二部份

SC12

榮單位

(燈亮，只見榮回家)

榮：媽，我返嚟嘞。……媽？……媽？

(靜)

媽……

(燈滅)

第二部份

SC13

士多

接 11

(燈亮，安在焦急的打電話)

安：喂？肥強呀？……有冇見過阿英呀？……佢唔係去咗你度送貨咩？……咁你有冇見過佢吖？……你唔好理吖！總之！你見到佢，叫佢即刻打電話返士多。係咁啦！

(安收線，仍焦急的踱步，不時往遠處看)

安：大姐呀！冇時間嘞！……

(安再翻看數簿，再打電話)

(此時英疲倦的從另一邊步回士多)

英：表哥。

(安看著英，興奮得說不出話來)

(二人對望)

(燈滅)

第二部份

SC14

眉單位門前

夜

(叩門聲)

(燈亮，榮站於少眉門前，少眉開門)

(二人對望，靜)

眉：搵我做咩？

(靜)

榮：我阿媽過咗身……

(長頓)

我有乜朋友，……我只係想搵個人倍吓……

(長靜)

如果唔方便，……我走先……

(榮想離去)

眉：我屋企人返咗鄉下，聽日先返。

(少眉說完便入屋，留下榮和還未關上的門閘)

(燈滅)

安：(vo) 你知唔知今日特赦？

英：(vo) 我知，祺哥帶咗我去登記……

第二部份

SC15

士多

接 13

(燈亮，英和安仍在上場的位置，只是祺已在英的身後不遠處)

(一會)

(安越過英，步到祺的面前。一會。)

安：祺，唔該晒……

祺：安哥，唔使客氣……

安：英呀。……攞到身分證，……就出去搵份好工，唔好再留喺度嘞。

(安轉身回士多，越過英，英看著安，但安沒有看英一眼，入了士多，離去。英

跟著他步到士多，英並沒有進去，她只在貨架前停下，不知如何是好)

(躊躇間，英發現架上的一本書，她拿來看，發現是那本安之前放上去的 **Business Letter**)

(英如夢初醒)

(祺看著她)

(燈滅)

VO：香港政府實施嘅特赦政策，已於今晨零時零分結束，經初步估計，全港大約有 20 萬名非法入境者登記，而未能於限時內報到者…… (聲音漸細)

第二部份

SC16

少眉單位門前

清晨

(燈亮，榮仍站在門外。)

(一會，燈滅)

(投影打出，很快的畫面，當中包括雲的快速移動，人的步行，及花於風中的畫面等。最後，畫面打出「1980年」)

第二部份

SC17

士多

夏天下午

（安在看鋪，榮身穿便服入，）

榮：安哥。

安：榮？幾時返嚟㗎？

榮：啱啱返之嘛，咪嚟探吓你囉。你好嗎？

安：算係咁啦！……呀係！飲唔飲嘢呀？

榮：好呀。俾支 cola 我吖。

安：等陣吖！（向內大叫）英呀！擺支 cola 出嚟吖！

（榮看著安笑）

英：（內聲）哦！

安：（向榮）返嚟搵佢呀？

榮：（只笑笑，並沒有回答）……。

英：（出來）表哥，cola 呀！（發現榮）榮哥？幾時返嚟㗎？

榮：啱啱之嘛。

安：（向英）關你咩事啫？（向榮）點呀？喺度飲呀？

榮：唔使嘞。我可以擺走。幾錢呀？

安：一蚊吖。

榮：好呀，（拿錢）安哥，呢度一蚊。我走先。

安：好呀！得閒返嚟傾吓計吖。

榮：好呀！bye bye。

安：bye bye。

榮：（向英）bye bye。

英：bye bye。

（榮離去）

英：榮哥咁耐唔返嚟，咁急就走嘅？

安：你理得人吖。你唔使走咩？

英：吓？表哥，今日咁早放我呀？

安：今日做節吖嘛。

（祺入）

祺：安哥。

安：點呀？祺哥仔，今日咁早呀？

祺：今日做節吖嘛。咪早啲放囉。（向英）阿英，幾時走得呀？

英：得嘞。表哥話早啲放我返屋企做節嘞。

祺：係？點係呀安記。少呵嘞！

安：你收嚟！係咪唔想走呀？

祺：唔係。咁我哋走先嘞！英，行嘞。

英：哦。表哥，我哋返去先嘞。聽日見啦。

安：得嘞！唔好遲到呀！係咁啦。

(他們揮手道別，祺和英一同離去，留下安)
(安看著他們離去，點煙，神態自若的抽著)
(燈滅)

第二部份

SC18

少眉單位門前

(燈亮，榮站於門前，春開門)

春：搵邊個呀？

榮：唔該，我想搵少眉。

春：家姐？喺加拿大啲。

榮：係咩？

春：係呀！移咗民好耐啦！你係佢朋友呀？不如我俾佢個電話你吖？

榮：唔使嘞，唔該。

春：咁好啦。仲有冇嘢吖？

榮：冇嘞。打搞晒。

春：唔緊要。

(春關上門，只剩下榮)

(一會，榮轉身，微笑)

(他開始走的時候，燈滅)

(音樂入，投影打出：完)

*****完*****